

Aatsitassat pillugit ingerlatallu tamatumunnga pingaarutillit pillugit inatsisartut inatsisaata (aatsitassanut ikummatissanullu inatsit) allangortinneqarnera pillugu Inatsisartut inatsisaat

§ 1

Aatsitassat pillugit ingerlatallu tamatumunnga pingaarutillit pillugit inatsisartut inatsisaanni nr. 7, 7. december 2009-meersumi (aatsitassanut ikummatissanullu inatsit), takuuk Namminersorlutik Oqartussat inatsimmut nalunaarutaat nr. 8, 27. februar 2020-meersoq, Inatsisartut inatsisaanni nr. 27, 13. juni 2023-meersumi aamma Inatsisartut inatsisaanni nr. 35, 4. juni 2024-meersumi allangortinneqartoq, makkua allangortinneqarput:

1. § 3 imatut oqaasertalerneqarpoq:

“ § 3. Naalackersuisut aatsitassanut suliaasaqarfimmi allaffissornikkut oqartussaapput, ilanngullugit pissutsit aatsitassanut, aatsitassarsiorluni ingerlatassanut, nunap iluata toqqorsivittut imaluunniit aatsitassarsiorluni ingerlatassat pillugit siunertanut atorneqarneranut, nukissiuuteqarnermi ingerlataqarnermut taakkununnga atasunut, ruujorilersuilluni ingerlataqarnermut taakkununnga atasunut aamma ingerlatassanut allanut taakkununnga atasunut tunngassutillit tamarmik.

Imm. 2. Pissutsit aatsitassanut, aatsitassarsiorluni ingerlatassanut, nunap iluata toqqorsivittut imaluunniit aatsitassarsiorluni ingerlatassat pillugit siunertanut atorneqarneranut, nukissiuuteqarnermi ingerlataqarnermut taakkununnga atasunut, ruujorilersuilluni ingerlataqarnermut taakkununnga atasunut aamma ingerlatassanut allanut taakkununnga atasunut tunngassutillit tamarmik ataatsimoortumik oqartussani suliarinninnermi akuliusimatinneqartutut isumagineqarnissaat, Naalackersuisut isumagissavaat.

Imm. 3. Oqartussamik, pisinnaatitsissummik pigisaqartunut allanullu suleqatigisartakkanut Inatsisartut inatsisaanni matumani pineqartunut ilaasunut tunngatillugu aatsitassanut suliaasaqarfik pillugu allaffissornikkut attaveqatigiinnermik isumaginnittussamik, Naalackersuisut toqqaassapput.

Imm. 4. Imm. 2 malillugu oqartussat suliarinninneranni ilaatinneqarput, ingerlatassanut pissutsinullu Inatsisartut inatsisaanni pineqartunut ilaasunut tunngatillugu, inatsisit maleruagassallu allat. Taamaattoq inatsisit imaluunniit maleruagassat allat malillugit oqartussat allat oqartussatut suliarinnittussaasimappata, tamanna atuutissanngilaq.”

2. § 3 a imatut oqaasertalerneqarpoq:

“ § 3 a. Pinngortitamut avatangiisinullu tunngasut pillugit suliaasanik suliarinninnerup, Inatsisartut inatsisaat malillugu akuersissutit akuersissuteqarnerillu pillugit suliaasanik suliarinninnermut allamut attuumassuteqanngitsumik, ingerlanneqarnissaa Naalackersuisut isumagissavaat.

Imm. 2. Pinngortitamut avatangiisinullu tunngasut pillugit nalilersuinerit aalajangiinerillu, ilisimatuussutsikkut sullissivimmit arlaannaannulluunniit attuumassuteqanngitsumut ataatsimit arlalinnilluunniit aalajangiinissanut nalilersuinerit missingiutinillu, aallaaveqartinneqassapput.”

3. § 3 b imatut oqaasertalerneqarpoq:

“ § 3 b. Pinngortitamut avatangiisinullu tunngasut pillugit aalajangiinerit naammagittaalliutigineqarsinnaanerit pillugu aalajangersakkanik Naalackersuisut aalajangersaassapput.”

4. § 3 c atorunnaarsinneqarpoq.

§ 2

Inatsisartut inatsisaat manna ulloq 1. juli 2026 atuutilerpoq.

Namminersorlutik Oqartussat, ulloq 29. maaji 2026

Jens-Frederik Nielsen
Naalakkersuisut Siulittaasuat

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut